

四庫全書

經部

欽定四庫全書

經部

五禮通考卷八十五

詳校官侍郎

臣劉曜雲

給事中

臣溫常綬覆勘

總校官進士

臣繆琪

校對官助教

臣汪錫魁

謄錄監生

臣吳炳文

欽定四庫全書

五禮通考卷八十五

刑部尚書秦蕙田撰

吉禮八十五

宗廟時享

蕙田案祭義云祭不欲數數則煩祭不欲疏疏則怠是故君子合諸天道霜露既降君子履之必有悽愴之心春雨露既濡君子履之必有怵惕之心

此時移節變孝子感而思親四時之祭所由昉也
虞夏及殷散見於詩書傳記者其禮意略可概見
自姬公定制所謂郁郁乎文者蓋莫盛焉惜禮經
燔沒高堂生所傳儀禮特牲饋食少牢饋食有
司徹三篇僅大夫士之禮而天子諸侯宗廟之
禮亡矣故漢志即有推士禮而致於天子之譏
昔朱子嘗欲以二禮及注疏所言折衷以爲天
子祭禮書未及成門人黃勉齋楊信齋自致齊

而裸獻而饋食以至加爵徹俎旅酬登餽繹
祭之儀爲經傳通解續規模稍備然經文但
載注疏而百家之說未錄行禮雖有節次而
闕畧之處尚多其中朝踐饋食九獻三詔薦
血爓祭割牲燔燎加籩卒爵先後彼此之岐
異同疑似之辨衆說紛紜淆然錯出明儒丘
氏濬大學衍義補嘗言古禮今世雖不能盡
行然三代聖王制作之深意亦不可使其泯

減不存乞詔儒學之臣參考編類別爲一書
以補六藝之闕遇國家有稽古禮文之事於
此得以考據使聖賢精神心術之微儀文度
數之詳不至於墜地是蓋天地間一盛典詳
哉切切乎其言之今以周禮爲綱及儀禮所
載大夫士之禮與夫戴記之禮運禮器郊特
牲祭義祭統明堂位諸篇及諸儒義疏有補
于禮者推類而求尋其脉絡析其條理綴輯

成篇自始迄終俱有歸宿庶幾不失朱子遺意而歷代時享沿革及唐宋元明儀注詳列於後俾古者天子諸侯祭禮畧可考焉

周禮春官小宗伯掌四時祭祀之序與其禮

肆師以歲時序其祭祀

禮記祭義祭不欲數數則煩煩則不敬祭不欲疏疏則怠怠則忘是故君子合諸天道春禘秋嘗霜露既降君子履之必有悽愴之心非其寒之謂也春雨露既濡君

子履之必有怵惕之心如將見之樂以迎來哀以送往

故禘有樂而嘗無樂

注合于天道因四時之變化孝子感時念親則以此祭之也春禘夏

殷禮也周以禘爲殷祭更名春祭曰祠非其寒之謂謂悽愴及怵惕皆爲感時念親也霜露既降脫秋字迎來而樂樂親之將來也送去而哀哀其享不可知也疏此節明孝子感時念親四時設祭之意禘陽之盛也嘗陰之盛也陰陽氣盛孝子感而思念其親故君子制禮合於天道

周氏謂曰一歲之內天時有四而宗廟之祭亦有四故舉春以見夏舉秋以見冬殷人有六禘則小禘爲春祭之名周人一禘而已則祠爲春祭之名

祭統凡祭有四時春祭曰禘夏祭曰禘秋祭曰嘗冬祭

曰烝

注謂夏殷時禮也

禘陽義也嘗烝陰義也禘者陽之盛

也嘗者陰之盛也故曰莫重於禘嘗古者於禘也發爵

賜服順陽義也於嘗也出田邑發秋政順陰義也故記

曰嘗之日發公室示賞也草艾則墨未發秋政則民弗

敢草也

疏此一節明祭祀之重禘嘗之義禘者陽之盛也者以禘祭在夏夏為炎暑故為陽盛嘗者陰

之盛也者以嘗祭在秋之時陰功成就故為陰盛冬雖嚴寒以物於秋成故不得以冬烝對夏禘

郊特牲饗禘有樂而食嘗無樂陰陽之義也凡飲養陽

氣也凡食養陰氣也故春禘而秋嘗春饗孤子秋食耆

老其義一也而食嘗無樂飲養陽氣也故有樂食養陰氣也故無聲凡聲陽也

祭統禘嘗之義大矣治國之本也不可不知也明其義者君也能其事者臣也不明其義君人不全不能其事爲臣不全夫義者所以濟志也諸德之發也是故其德盛者其志厚其志厚者其義章其義章者其祭也敬祭敬則竟內之子孫莫敢不敬矣

疏此一節明祭祀之重禘嘗之義人君若能明

於其義可以爲民父母

王制天子諸侯宗廟之祭春曰禘夏曰禘秋曰嘗冬曰

烝

注此蓋夏殷之祭名周則改之春曰祠夏曰禘以禘

為殷祭詩小雅曰

禘祠烝嘗于公先王此周四時祭

宗廟之名

疏此一節論夏殷天子諸侯大夫四時祭

宗廟之事春曰

禘者皇氏云

禘薄也春物未成其祭品

鮮薄也孫炎曰

禘者新菜可

禘夏曰禘者皇氏云禘者

次第也夏時物雖未成宜依時次第而祭之秋曰嘗者

白虎通云嘗者新穀熟而嘗之冬曰烝者烝者衆也冬

之時物成者衆孫炎云

烝進也進品物也

注蓋為夏

殷祭名者以其祭名與周不同故以為夏殷祭名其夏

春禘者鄭氏注云禘當為禘從此為正祭義曰春禘鄭

注直云夏殷禮不破禘字者以郊特牲已改禘為禘故

於祭義畧之從可知也云周則改之春曰祠夏曰禘者

案宗伯云以祠春享先王以禘夏享先王又知周以禘

五禮通考

五

五

五

為殷祭者案公羊傳曰五年而再殷祭又春秋經僖八年秋七月禘於太廟是禘為殷制殷猶大也謂五年一大祭引詩小雅者是文王之詩天保之篇謂文王受命已改殷之祭名以夏祭之禘改名曰禘而詩先言禘後祠者從便文嘗在
烝下以韻句也

蕙田案以上五條皆以禘為春夏時祭與周不同注疏家皆以為夏殷祭名然不可考矣
周禮春官大宗伯以祠春享先王以禴夏享先王以嘗秋享先王以烝冬享先王

鄭氏鐸曰祠春禴夏嘗秋烝冬之享時祭之名也禮不豐不殺所以稱時有以少為貴者有以多為貴者

春夏以蒐苗而奉祭祀時物方生可獻者寡故春以
詞為主夏以樂為主而已尚詞者為物不足以言詞
道意也尚樂者陽氣浸盛樂由陽來也此所謂以少
為貴也秋冬以獮狩而奉祭祀百物既登可獻者衆
故秋以薦新為主冬以備物為主焉嘗者物初成始
可嘗于是而薦新也烝者物畢皆可烝于是而備物
也此以多
為貴者也

司尊彛春祠夏禴秋嘗冬烝

詩小雅天保吉蠲為饎是用孝享禴祠烝嘗于公先王

傳春曰祠夏曰禴秋曰嘗冬曰烝公事也疏若以四
時當云祠禴嘗烝詩以便文故不依先後此皆周禮文
自殷以上則禴禘嘗烝王制文也至周公則去夏禘之
名以春禴當之更名春曰祠故禘祫志云王制記先王

之法度宗廟之祭春曰禴夏曰禘秋曰嘗冬曰烝禘為大祭於夏於秋於冬周公制禮乃改夏為禴禘又為大祭祭義注云周以禘為殷祭更名春曰祠是祠禴嘗烝之名周公制禮之所改也若然文王之詩所以已得有制禮所改之名者然王者因革與世而遷事雖制禮大定要亦所改有漸易曰不如西鄰之禴祭鄭注為夏祭之名則文王時已改言周公者據制禮大定言之耳公事釋詁文

汪氏克寬曰春祠夏禴秋嘗冬烝此周制時享之定名也詩云禴祠烝嘗蓋取咏歌之叶韻耳其非有異也

春秋桓公八年公羊傳春曰祠夏曰禘秋曰嘗冬曰烝爾雅春祭曰祠夏祭曰禘秋祭曰嘗冬祭曰烝

春秋繁露四祭古者歲四祭四祭者因四時之所生
熟而祭其先祖父母也故春曰祠夏曰禘秋曰嘗冬
曰烝此言不失其時以奉祀先祖也過時不祭則失
爲天子之道也祠者以正月始食韭也禘者以四月
食麥也嘗者以七月嘗黍稷也烝者以十月進初稻
也此天之經也地之義也

蕙田案以上周四時之祭名

春秋昭公十五年二月癸酉有事於武宮

汪氏克寬曰周官祠禴祫嘗為四時之祭左氏傳曰禘於武宮是以禘為四時之祭蓋見經書禘于莊公遂例以為禘而悞耳考之王制春曰杓夏曰禘此蓋夏殷之祭名與周不同蓋周更時祭之名而後禘為大祭也然有事武宮乃春祠之祭曷不以祠祭之名書而止曰有事蓋祭之日叔弓蒞事籥入而卒去樂卒事雖得時而不成乎禮春秋乃變文而書之以著其失也

蕙田案此條係祠祭

易萃六二引吉无咎孚乃利用禴

注居萃之時處于中正而行以忠信故可

以省薄薦于鬼神也正義曰孚乃利用禴者禴殷春祭之名也四時之祭最薄者也

既濟九五東鄰殺牛不如西鄰之禴祭

注牛祭之盛者禴祭之薄者居

既濟之時而處尊位物皆濟矣將何為焉其所務者祭祀而已祭祀之盛莫盛修德故沼沚之毛蘋蘩之菜可羞於鬼神故黍稷非馨明德唯馨是以東鄰殺牛不如西鄰之禴祭實受其福也

周禮夏官大司馬中夏教芟舍遂以苗田如蒐之灋獻

禽以享禘

注芟舍草止之也夏田為苗擇取不孕任者禘宗廟之夏祭也冬夏田主於祭宗廟者陰

陽始起象神之內疏以草釋芟以止釋舍軍有草止之法冬夏田主於祭宗廟陰陽始起象神之內者仲冬一陽生仲夏一陰生是陰陽在內故神象之而行祭也此祭因田獵獻禽為祭若正祭自在孟月

蕙田案以上三條禴祭

詩魯頌閟宮秋而載嘗夏而槁衡

變秋將嘗祭於夏則養牲

周禮春官肆師嘗之日涖卜來歲之芟

注芟芟草除田也古之始耕者

除田種穀嘗者嘗新穀此芟之功也卜者問後歲宜芟否

春秋桓公五年左氏傳始殺而嘗

注建酉之月陰陽始殺嘉穀始熟故薦嘗

于宗廟

十四年秋八月壬申御廩災乙亥嘗

注御廩藏公所親耕以奉粢盛之倉

也天火曰災既戒日致齊御廩雖災苟不害嘉穀則祭不應廢故書以示法

襄公二十八年左氏傳十一月乙亥嘗於太公之廟慶

舍泣事麻嬰爲尸慶集爲上獻

禮記祭義仲尼嘗奉薦而進其親也慤其行也趨趨以數已祭子貢問曰子之言祭濟濟漆漆然今子之祭無濟濟漆漆何也子曰濟濟者容也遠也漆漆者容也自反也容以遠若容以自反也夫何神明之及交夫何濟濟漆漆之有乎反饋樂成薦其薦俎序其禮樂備其百官君子致其濟濟漆漆夫何恍惚之有乎夫言豈一端而已夫各有所當也

注嘗秋祭也親謂身親執事時也慤與趨趨言少威儀也容以遠言

非所以接親親也容以自反言非孝子所以事親也此皆非與神明交之道也天子諸侯之祭或從血腥始至

反饋是進熟也薦俎豆與俎也恍惚思念益深之時也豈一端言不可以一槩也禮各有所當行祭宗廟者賓客濟濟漆漆主

人趨而趨趨

蕙田案以上五條嘗祭

周禮夏官大司馬仲冬教大閱遂以狩田入獻禽以享烝

書洛誥戊辰王在新邑烝祭歲文王騂牛一武王騂牛

一疏鄭玄以烝祭上屬歲文王騂牛一者歲是成王元一年正月朔日特告文武封周公也案周頌烈文序云成王即政諸侯助祭鄭箋云新王即政必以廟享之禮祭於祖考告嗣位也則鄭意以朝享之後特以二牛告

文武封周公之
後與孔義不同

春秋桓公五年左氏傳閉蟄而烝

注建亥之月昆蟲閉戶萬物皆成可薦者

衆故烝
祭宗廟

八年春正月己卯烝公羊傳烝者何冬祭也常事不書

此何以書譏亟也亟則黷黷則不敬君子之祭也敬而

不黷疏則怠怠則忘士不及茲四者則冬不裘夏不葛

注四者四時祭也

疏數之節靡所折中是故君子合

諸天道感四時物而思親也祭必于夏之孟月者取其

見新物之月也裘葛者御寒暑之美服士有公事不得

及此四時祭者則不敢美其衣服蓋思念親之至也

穀梁傳烝冬事也春興之志不時也

夏五月丁丑烝穀梁傳春夏興之黷祀也志不敬也

注春

祭曰祠薦尚韭卯夏祭曰禴薦尚麥魚秋祭曰嘗薦尚黍肫冬祭曰烝薦尚稻鴈無姓而祭曰薦薦而加牲曰祭禮各異也失禮祭祀例日得禮者時定八年冬從祀先公是也僖八年秋七月禘于太廟月者謹用致夫人耳禘無進禮

汪氏克寬曰周官祠禴嘗烝為四時之祭是已攷之春秋常祭不書書必有譏如桓公八年春夏兩以烝書者譏其不時而且黷如桓公十四年八月嘗本得其時蓋因其壬申御廩災越四日乙亥嘗譏以災餘之粟祭為不敬也如昭公十五年春二月有事于武宮蓋春祠也如宣八年夏六月有事於太廟即夏禴

也祭得其時于祭無譏故不書名止云有事所以書者一則譏宣公以仲遂之喪猶繹而萬入去籥是忘大臣之哀一則譏昭公以叔弓之喪籥入而去樂卒事是殺宗廟之禮其取義各有所重也

襄公十五年冬十有一月晉侯周卒十六年正月葬晉

悼公平公即位烝于曲沃

注平公悼公子彪曲沃晉祖廟烝冬祭也諸侯五月而葬

既葬卒哭作主然後烝嘗于廟今晉踰月葬作主而烝祭傳言晉將有涇梁之會故速葬

蕙田案以上七條烝祭

中庸春秋修其祖廟陳其宗器設其裳衣薦其時食宗廟之禮所以序昭穆也序爵所以辨貴賤也序事所以

辨賢也旅酬下爲上所以逮賤也燕毛所以序齒也踐其位行其禮奏其樂敬其所尊愛其所親事死如事生事亡如事存孝之至也

丘氏濬曰事死如事生事亡如事存此兩言者仁人孝子不忍其親而萬世奉親思孝之要道也

右時享名義

禮記王制天子犴醢禘祫嘗祫烝

程子曰歲四祭三祭合食於祖廟惟春則徧祭諸廟
陳氏澂曰祫合也其禮有二時祭之祫則羣廟之主皆升而合食於太祖之廟而毀廟之主不與三年大

禘則毀廟之主亦與焉天子之禮春禘則特祭者各於其廟也禘嘗烝皆合食

諸侯禘則不禘禘則不嘗嘗則不烝烝則不禘

陳氏澂曰南方諸侯春祭畢則夏來朝故闕禘祭西方諸侯夏祭畢而秋來朝故闕嘗祭四方皆然

諸侯禘禘一禘一禘嘗禘烝禘

陳氏澂曰禘禘禘禘非有異也變文而已禘嘗禘烝與嘗禘烝禘亦然諸侯所以降於天子者禘一禘一禘而已言夏祭之禘今歲禘則來歲禘禘之明年又禘不如天子每歲三時皆禘也

陳氏禮書君子以義處禮則祭不至於數煩以仁處禮則祭不至於疏怠悽愴發於霜露之既降怵惕生

於雨露之既濡此所以有四時之享也然四時之享
皆前期十日而齋戒前祭一日而省眡祭之日禮交
動乎上樂交應乎下自再裸以至九獻其禮非一舉
自致神以至送尸其樂非一次以一日而歷七廟則
日固不足而強有力者亦莫善其事矣若日享一廟
前祭視牲後祭有繹則彌月之間亦莫既其事矣考
之經傳蓋天子之禮春則牷祭夏秋冬則合享牷祭
各於其廟合享同於太廟王制曰天子牷禘禘禘

嘗禘烝諸侯禘一牷一禘一禘是天子春牷而三時
皆禘諸侯亦春牷而秋冬皆禘其異於天子者禘一
牷一禘而已禘一牷一禘而嘗烝皆禘是始年再禘
次年三禘也天子言牷禘諸侯言禘牷天子言禘禘
禘嘗禘烝諸侯言嘗禘烝禘此特變文而已非有異
也鄭氏曰天子先禘而後時祭諸侯先時祭而後禘
凡禘之歲春一禘而已孔穎達曰皇氏以為虞夏
禘祭每年爲之又云三時禘者夏秋冬或一禘焉案
禘禘志云禘于秋于冬于夏則夏商三時俱殷祭皇
氏之說非也其
言皆無所據
楚茨之詩始言以往烝嘗終言神具

醉止儀禮大夫三廟筮止丁亥之一日而言薦歲事
於皇祖禮記云嘗禘之禮所以仁昭穆則會羣神於
烝嘗而具醉者祫也合三廟於一日而薦於皇祖者
亦祫也嘗禘所以仁昭穆亦祫也祫有三年之祫有
時祭之祫時祭小祫也士虞禮曰薦此祫事則時祭謂之祫宜矣三年之
祫大祫也時祭有小禮有大禮小禮春也大禮夏秋
冬也公羊傳曰大事者何大祫也則明時祭之祫爲
小祫矣禮記曰大嘗周禮曰大烝則春祠爲小禮矣

蓋小祫止於未毀廟之主大祫已及於毀廟之主禮
記曰周旅酬六尸又曰祫於太廟祝迎四廟之主夫
天子旅酬止于六尸諸侯迎主止於四廟非小祫而
何

大學衍義補丘氏濬曰古者天子七廟天子以一人
之身而於一日之間徧行七廟之禮雖有強力之容
肅敬之心非獨心力有所不逮亦恐日力有所不給
矣昔季氏以大夫行一祭事日不足而繼之以燭他

日子路與祭畧其煩文然質明行事猶至晏朝而退夫以大夫行一祭猶且許時况天子以燕安之體具冕服裸饋乃於半日之短畧行九獻之盛禮而欲一日七舉行雖強力之匹夫有所不勝也况萬乘之尊哉世儒泥古而不通變因王制此章有禘祭名之誤遂以此爲夏殷之祭夫禮合於義適其時斯可行矣尚何殷周之拘况七廟之制商已有之周承殷後已從其廟制之數則其所行之禮安知不相沿襲哉

本朝歲五祀皆合享於太廟雖不拘拘於古而自與古意合云

右時享牷禘

書益稷夏擊鳴球搏拊琴瑟以詠祖考來格虞賓在位羣后德讓下管鼗鼓合止祝敔笙鏞以間鳥獸蹌蹌蕭

韶九成鳳凰來儀

疏此舜廟堂之樂徽子之命云作賓於王家詩頌徽子之來謂之有客是

王者之後為時王所賓也故知虞賓謂丹朱為王者後故稱賓也王者立二代之後而獨言丹朱者蓋高辛氏之後無文而言故唯指丹朱也王者之後尊於羣后故殊言在位羣后亦在位也後言德讓丹朱亦以德讓矣

故言與諸侯助祭班爵同者推先有德也二王之
後並爲上公亦有與丹朱爵同故丹朱亦讓也

禮記郊特牲有虞氏之祭也尚用氣血腥燔祭用氣也

注尚謂先薦之燔或爲臠疏有虞氏之祭也尚用氣
者尚謂貴尚其祭祀之時先薦用氣物也血腥燔祭用
氣也者此解用氣之意血謂祭初以血詔神於室腥謂
朝踐薦腥肉於堂燔謂沈肉於湯次腥亦薦於堂祭義
云燔祭祭腥而退是也今於堂以血腥燔三者而祭是
用氣也以其並未孰故云用氣也正義曰言先薦者對
合享饋孰爲先也此虞氏尚氣殷人尚聲周人尚臭皆
謂四時常祭也若其大祭祫周人仍先用樂也故大司
樂云若樂九變則人鬼可得而禮矣鄭云先奏是樂以
致其神而後裸馬推此言之虞氏大祭亦先作樂也故
鄭注大司樂引虞書云戛擊鳴球搏拊琴瑟以詠祖考
來格蕭韶九成鳳皇來儀此宗廟九奏之節此虞氏大

祭與周同樂九奏夏殷大祭雖無文或當與周同熊氏
以為殷人先求諸陽謂合樂在灌前周人先求諸陰謂
合樂在灌後與降神之樂別熊氏又云凡大祭並有三
始祭天以樂為致神始以煙為歆神始以血為陳饌始
祭地以樂為致神始以埋為歆神始以血為陳饌始祭
宗廟亦以樂為致神始以灌為歆神始以腥為陳饌始
義或然也案禮宗廟之祭先薦血後薦
腥而云宗廟腥為陳饌始於義未安也

明堂位有虞氏祭首

注氣主盛也

陳氏禮書祭以右手凡祭必於脯醢之豆間特公食
大夫有司徹祭於上豆之間以豆數多故也祭之尚
肺周禮而已若有虞氏則祭首夏后氏則祭心殷則

祭肝以時異則禮異也

方氏慤曰有虞氏祭首尚用氣故也氣雖有陰陽之異要之以陽為主耳首者氣之陽也

蕙田案此虞氏時享按祭之禮也禮書謂儀禮少牢舉肺祭肺三皆切之舉肺一者尸之所先食者也祭肺三者尸與主人主婦之所祭者也祭肺三皆在尸俎而舉肺各於其俎故儀禮尸俎阼俎以至主婦佐食賓長兄弟宗人衆賓及衆兄弟內賓宗婦公有司之俎

皆離肺一則祭肺三者施於尸主人主婦之
授祭也皆離肺一者自尸至公有司食之也
周官太祝隋釁令鐘鼓小祝大祭禮贊隋守
祧既祭藏其隋儀禮士虞祝命佐食隋祭特
牲祝命尸授祭之尸取菹孺于醢祭于豆間
佐食授主人授祭主婦則佐食授祭少牢尸
受肺與黍同祭于豆間主人佑受佐食授祭
坐祭之主婦亦受佐食授祭祭之鄭康成謂

下祭曰隋則隋與春秋傳所謂隋成之隋同
周官與士虞作隋少牢與禮記作綏特牲作
綏其實一也隋祭所以祭鬼神之物猶生者
之飲食必祭也而尸與主人主婦皆有是禮
則尸既舉奠而綏祭祭神食也主人受酢而
綏祭祭尸食也周人所祭莫先于肺則有虞
氏之所祭莫先于首其義一而已矣

泰有虞氏之尊也

注泰用瓦疏考工記云
有虞氏尚陶故知泰用瓦

方氏翹曰泰司尊彝謂太古之
瓦尊蓋彼名其質此名其義也

蕙田案經文下云山罍夏后氏之尊著殷尊
周犧象禮器云廟堂之上罍尊在阼犧尊在
西君在阼夫人在房君西酌犧象夫人東酌
罍尊疏罍尊在阼謂夫人所酌也犧尊在西
謂君所酌也熊氏云此謂諸侯時祭所用之
禮據此觀於諸侯而天子之禮可知觀於周
之犧象而有虞氏之泰尊其用於時祭之禮

蓋可推矣蓋宗廟之獻尊也

有虞氏之兩敦

注黍稷器

陳氏祥道曰敦者養人之厚也

方氏慤曰兩敦若內則所謂敦周官所謂玉敦是矣釋者以為宗廟之器焉

陸氏佃曰敦亦簋也
蓋設以對故謂之敦

蕙田案此有虞氏宗廟時享盛黍稷之器觀於下文四璉六瑚八簋可知蓋三代相承而漸增其數也

俎有虞氏以梲

注梲斷木爲四足而已疏有虞氏質未有餘飾故鄭知梲有四足而已

方氏慤曰梲者斷木爲足無餘飾也苟完而已

蕙田案此有虞氏宗廟俎豆之制也經言俎而不言豆則豆當與夏同矣夏楬豆殷玉豆周獻豆方氏謂獻若周官所謂再獻之獻此言獻豆則主祭祀之豆耳據此豆爲祭祀之豆則俎爲祭祀之俎可知觀于周而有虞氏可知也

有虞氏服韍

注韍冕服之韠也舜始作之以尊祭服疏虞氏直以韋為韍未有異飾故服韍易

困卦九二朱紱方來利用享祀故鄭知韍為祭服

蕙田案此有虞氏時享之祭服也論語曰禹惡衣服而致美乎韍冕蓋韍則承虞之制而致美則加飾焉經所謂夏后氏山蓋以山畫於韍而成文也朱子謂韍冕皆祭服則虞氏可知矣

路史帝堯作七廟以享先祖祭以其氣迎牲殺於庭

毛血詔于室以降神然後樂作所以交神明也帝舜
踐天子之位春禘夏禘秋嘗冬烝所以報本反始也
通典有虞氏四時之祭名春曰禘夏曰禘秋曰嘗冬
曰烝其祭尚氣郊特牲云血腥爛祭用氣也法先迎
牲殺之取血告於室以降其神然後用樂而行祭事
其祭貴首

蕙田案以上虞書及禮記三條有虞氏時享
宗廟之禮樂也祭法有虞氏祖顓頊而宗堯

蔡氏書傳引蘇氏說而定爲神宗堯廟詳見
廟制門是有虞廟享之祖考也虞賓羣后助
祭之諸侯書言受終文祖格于文祖格于藝
祖皆因事告祭其禮簡此言時享其禮繁故
特著虞賓助祭之盛朱長孺謂祖考下繫虞
賓則考者堯也若舜祭其祖考而丹朱在位
是與商之孫子侯服駿奔何異其言最爲有
識書周頌清廟專言多士顯相對越駿奔以

明享祀之美觀于虞賓二句則其時於穆肅
雍之氣象恍然可思也虞賓稱在位羣后曰
德讓等級隆殺又秩然不紊典謨之體要如
此戛擊鳴球搏拊琴瑟以詠乃堂上升歌之
樂大戴禮所謂清廟之歌一唱而三歎郊特
牲云歌者在上貴人聲也周禮太師大祭祀
率瞽登歌令奏擊拊小師登歌擊拊其升歌
清廟之制本於此矣下管鼗鼓合止祝敔乃

堂下之樂郊特牲所謂匏竹在下周禮太師
下管播樂器令奏鼓鞀小師下管擊應鼓其
下管興舞之制本於此矣笙鏞以間乃笙入
間歌之樂儀禮鄉飲燕禮所謂笙入三成周
禮笙師共其鐘笙之樂眡瞭凡樂事播鼗擊
頌磬笙磬其間歌之制本於此矣簫韶九成
此合作之樂周禮大司樂大合樂以致鬼神
祇又曰若樂九變則人鬼可得而禮是九變

之樂即本於九成之韶無疑也始終條理節序分明廟享之樂莫備於書之所言矣郊特牲血腥燔祭用氣也案廟享之禮莫先于薦神有虞氏尚氣先殺牲以血詔神詩所謂取其血骨記曰血毛詔於室舉一血而釁燔燎羶鄉之事該之矣次薦腥禮運所謂腥其俎舉一腥而割牲羞俎豆之事該之矣次薦燔祭義所謂燔祭祭腥舉一燔而朝踐薦獻之

事該之矣至於明堂言祭首則尸與主人授
祭之禮也泰則獻酒醴之尊觀于尊而五齊
三酒可知也兩敦爲盛黍稷之器則饋食之
禮具矣俎以梲則陳饌之儀具矣韍則祭服
之制隆焉此皆虞氏廟享經文之可據者蓋
夫子刪書斷自唐虞孔子稱殷因于夏禮則
夏因于虞禮可知虞禮不可見而見於書者
夏擊鳴球一章其禮樂聲名之盛已令人莫

可思議兼之郊特牲明堂位而器服尊俎又有可推者如此則止廟享一事其信乎足以啟三王而承五帝也夫

觀承案經文簡括無所不包虞書此篇及禮記三條其義原是如此直以讀者鹵莽則失之得此推闡詳明而融貫爲一有虞氏一代之禮容樂節直已了了可數方不負聖賢作經之深意耳

右虞廟享

論語禹吾無間然矣非飲食而致孝乎鬼神

注致孝鬼神祭祀豐

潔疏飲食鬼神所享故云致孝

蕙田案致孝鬼神而言飲食則其爲時享薦

獻饋食可知矣

禮記明堂位夏后氏祭心

陳氏禮書夏非不祭肺也以心爲主而已

方氏慤曰三代各祭其所勝夏尚黑爲勝赤故祭心心于色爲赤故也必各祭其所勝者明非有所勝則

不能王天下而無
以致孝于鬼神矣

蕙田案此夏享祀隋祭之禮蓋承乎虞而改
革者也方氏祭其所勝之說存參

夏后氏牲尚黑

方氏慤曰夏后氏尚黑其亦用牡可知故
書言湯用元牡而釋者以爲未變夏祀也

夏后氏尚明水

疏夏后氏尚
質故用水

方氏慤曰明水陰鑒取
水於月得之於天者也

蕙田案二條夏后氏享祀之牲醴

山罍夏后氏之尊也

注罍猶雲雷也

方氏慤曰山罍即山尊也禮器亦謂之罍尊非謂諸臣所酢之罍也以山罍爲尊因謂之罍尊亦猶以壺爲尊因謂之壺尊

蕙田案據上下文言此當爲夏祭祀之獻尊

詳見前

爵夏后氏以琖

疏爵並以爵爲形琖以玉飾之

陳氏禮書考之爾雅鍾之小者謂之棧晉元興中剡縣民井中得鍾長三寸口徑四寸銘曰棧則棧卑而淺矣夏爵命之以琖蓋其制若棧然也祭統尸酢夫人執柄夫人受尸執足柄其尾也有足而尾命之以

爵蓋其制若雀然也。琖象棧爵象雀。言玉琖則飾可知矣。琖，簞先王之器也。唯魯與二王之後得用焉。諸侯用之則僭矣。故記曰：琖，簞及尸君非禮也。

方氏慤曰：夏殷未承以爵而亦通謂之爵者，自周始然耳。若所謂一升曰爵，夏則一升曰琖，殷則一升曰簞也。不然，則由周以前止有爵之名，由周以後又有爵之形也。

蕙田案：此夏享祀之爵。陸農師謂琖以齊言知然者，蓋齊亦或謂之棧酒。其說與禮書同。未知是否。然其爲祭祀所用無疑。

濯尊夏后氏以雞夷

注夷讀為彝。周禮春祠夏禴裸用雞彝。鳥彝。秋嘗冬烝裸用斚彝。黃彝。

疏彛法也與餘尊爲法故稱彛鷄彛者或刻木爲鷄形而畫鷄於彛鷄彛盛明水鳥彛盛鬱鬯彛黃彛義亦然

陳氏禮書尊之爲言尊也彛之爲言常也尊用以獻上及於天地彛用以灌施於宗廟而已故尊於祭器獨名尊彛於常器均名彛籍諱曰有勲而不廢撫之以彛器臧武仲曰大伐小取其所以作彛器則彛之爲常可知矣鷄者司辰之始則陰盛而陽微裸所以求之陰故夏后氏以之

方氏慤曰灌尊所以實灌鬯之尊也夷以對險夷者道之常故孟子引燕民之詩變彛爲夷者以此

蕙田案祭之屬莫重於灌而夏殷之制見於經者唯此一條可證宗廟之灌不始於周而

自夏已然夏因虞禮并不始於夏蓋唐虞之時已然也

其勺夏后氏以龍勺

注龍龍頭也疏此灌尊所用之勺龍勺勺爲龍頭

陳氏禮書龍勺龍陽中之陰也淵潛而爲仁以澤萬物故夏以之

方氏慤曰勺

用以酌酒者

陸氏佃曰龍勺以能施爲義

蕙田案此夏時享灌酒之勺

夏后氏之四璉

陳氏祥道曰璉者養人而不絕者也

陸氏佃曰四璉黍稷稻粱

蕙田案此夏后氏廟享盛黍稷之器

俎夏后氏以歲

注歲之言夔也謂中足爲橫距之象疏謂歲足間有橫似有橫夔之象

夏后氏以楬豆

方氏慤曰楬豆未有他飾以不爲柄若蜡氏之楬而已

蕙田案二條夏享祀之俎豆

夏后氏山

注山取其仁可仰也疏韞制夏后氏畫之以山

論語禹惡衣服而致美乎黻冕

注損其常服以盛祭服疏正義曰鄭玄注此

云黻是祭服之衣冕其冠也左傳晉侯以黻冕命士會亦當然也黻蔽膝也祭服謂之黻其他謂之韠俱以韋爲之制同而色異韠各從裳色黻其色皆赤尊卑以深淺爲異天子純朱諸侯黃赤大夫赤而已大夫以上冕服悉皆有黻故禹言黻冕左傳亦言黻冕但冕服自有尊卑耳此禹之黻冕則六冕皆是也

蕙田案二條夏享祀之黻冕

又案夏后氏祭禮于經最畧今據此各條推之祭心以爲隋祭而祭血祭腥燔祭之類統之矣宗廟以裸爲重而夏后氏行之祭亦以

牲醴爲敬而尚黑尚明水舉之矣尊罍爵琖
可徵九獻之文四璉俎豆以證黍稷庶羞之
用黻冕以彰祭服之美隱隱乎致孝鬼神之
事歷歷可想也蓋上以承唐虞之盛而道殷
周之先路矣

右夏廟享

詩商頌那猗與那與置我鞀鼓奏鼓簡簡衍我烈祖

烈傳

祖湯有功烈之祖也
箋奏鼓奏堂下之樂也烈
祖湯也以金奏堂下諸縣以樂我功烈之祖成湯

朱子詩傳記曰商人尚聲臭味未成滌蕩其聲樂三
闋然後出迎牲即此是也

劉氏瑾曰凡聲屬陽故曰樂由陽來
商人祭祀尚聲所以先求諸陽者也

朱氏公遷曰臭未成未用灌也味未成未用牲也滌
蕩者動而發散之義樂所以動其和而散之于外也

湯孫奏假綏我思成

箋湯孫太甲又奏
升堂之樂弦歌之

何氏楷曰奏即秦鼓之奏假至也謂奏樂以通之於
烈祖也陳浩云鬼神在天地間與陰陽合散同一理
而聲音之感無間顯幽故殷人之祭必先作樂黃佐
云商人未祭之先而作樂如周人取蕭祭脂亦於未
祭之前以此求神於陽也陳際泰云商人尊鬼而尚
聲聲召風風召氣氣召神然神懼其雜而集焉則有

湯孫之思矣思者氣之精者也鬼神非其類也不至
心有精氣而借聲以召之神無不格格者又烈祖已
焉綏我思成信哉其綏也歟觀
思成之說可以見祭祀之理

鞀鼓淵淵嘒嘒管聲既和且平依我磬聲於赫湯孫穆

穆厥聲

傳嘒嘒然也平正平也依倚也磬聲之清者也以象萬物之成周尚臭殷尚聲

王氏安石曰依我磬聲者言與堂上之樂諧也

黃氏震曰樂以悅神故曰於赫湯孫穆穆厥聲以修言其樂之美如飲食云苾苾芬芬以修言其飲食之美凡以悅神非自誇也

庸鼓有數萬舞有奕我有嘉客亦不夷懌

傳大鐘曰庸

朱子詩傳上文言鞀鼓管籥作於堂下其聲依堂上之玉磬無相奪倫者至於此則九獻之後鐘鼓交作萬舞陳於庭而祀事畢矣

濮氏一之曰執籥秉翟者文舞也朱子玉戚者武舞也萬舞乃二舞之總名今言萬舞有奕正謂文武迭用而有序

劉氏瑾曰周制宗廟九獻之次尸未入前王裸于奧以降神一獻也后亞獻二獻也尸入薦血腥後王酌泛齊獻尸所謂朝踐三獻也后酌醴齊亞獻亦爲朝踐四獻也薦熟畢王酌盎齊獻尸五獻也后酌緹齊亞獻六獻也皆所謂饋獻也尸乃食訖王更酌朝踐之泛齊以酌尸所謂朝獻七獻也后更酌饋獻之緹

齊以亞醕所謂再獻八獻也又有諸臣爲賓者之一獻凡九也若商之九獻則未有考

朱氏公遷曰祭將畢時樂盛作如楚茨言鐘鼓既戒鼓鐘送尸亦其一徵也

何氏楷曰嘉賓謂二王後及諸侯來助祭者蔡汝楠云於虞曰虞賓在位於商曰我有嘉賓於周曰我客戾止聖人御世皆考賓國之化

自古在昔先民有作溫恭朝夕執事有恪

嚴氏粲曰先民猶言前人作承上文謂作樂也言聲樂之盛非今日始作之乃古昔之時前人所作也

顧予烝嘗湯孫之將

疏王制祭統言四時祭名皆云春

名是烝嘗爲時祭故云念我殷家有時祭之事而來也若然郊特牲云饗禘有樂而食嘗無樂故春禘而秋嘗

注禘當爲禘字之悞也王制云春禘夏禘鄭引王制夏殷以正特牲之文則特牲所云食嘗無樂是夏殷禮矣此云烝嘗則是秋冬之祭而上句盛陳聲樂者此經所陳總論四時之祭非獨爲秋冬發文直此烝嘗之言爲韻耳縱使嘗實無樂而禘有之故得言其聲樂也且禮文殘缺鄭以異於周法者即便推爲夏殷未必食嘗無樂非夏禮也箋以湯孫爲太甲故言太甲之扶助傳以湯爲人之子孫則將當訓爲大不得與鄭同也王肅云言嘉客顧我烝嘗而來者乃湯爲人子孫顯大之所致也

何氏楷曰李本云嘗秋祭烝冬祭祭以秋冬爲備故言祭者必舉烝嘗以見其餘焉愚按烝嘗者謂烝繼嘗而舉知此乃冬祭也

序那祀成湯也

疏那之詩者祀成湯之樂歌也成湯創業垂統制禮作樂及其崩也後世

以時
祀之

歐陽氏修曰商人作頌以爲祀湯之樂歌述其祀時
樂舞之盛以衍樂先祖如周頌我將祀文王但述祀
時牛羊肥腠執競祀武王亦
言祀時鐘鼓管磬之類是也

烈祖嗟嗟烈祖有秩斯祜申錫無疆及爾斯所

箋功烈
祖成

湯

范氏處義曰言烈祖而云嗟嗟以簡樸
故也若周頌則言於穆於皇近于文矣

既載清酤賚我思成亦有和羹既戒既平

何氏楷曰清者潔清之義酤說文云一宿酒也徐錯
云謂造之夜而熟若今鷄鳴酒也酒只用一宿而成

者亦見商人尚質處

呂氏祖謙曰儀禮載祭祀燕享者每始言羹定蓋以羹熟爲節然後行禮定即戒平之謂此所謂既載清酤亦有和羹皆言祭之始也

劉氏瑾曰鄉飲酒禮鄉射禮燕禮大射儀公食大夫禮少牢饋食皆曰羹定鄭氏曰定猶熟也歐陽氏修曰既載清酤饗我思成謂以清酒裸獻而神饗我使成祀事也

范氏處義曰清酤和羹皆祭祀之物凡祭酒在先羹在後有次第也

醢假無言時靡有爭綏我眉壽黃耆無疆

何氏楷曰醢說文云釜屬假通作假說文云至也此

即雍人陳鼎之事中庸誤引作奏與湯孫奏假同文
朱子遂謂古聲奏族相近族聲轉平而爲駸此恐不
然彼言奏假此言駸假明是異字何得混駸爲奏乎
凡祭則雍人必先陳鼎所以爲烹牲體之用也今自
鼎初至之時而即皆能秉其肅敬靡有諠譁又各執
其事不相奪倫絕無交侵職位以有紛爭者此非主
祭者之精專於假廟何能使助祭者人人顧化若此
故中庸曰不賞而民勸不怒而民威於鈇鉞也

蕙田案何氏據說文解𩇑字與毛鄭朱傳異
考上文言清酤則裸獻之事該之矣言和羹
則薦腥薦熟之事該之矣此言𩇑至則移鼎
入陳之事該之矣似何氏爲確實靡有爭三
字亦有歸着蓋雍人所陳之鼎非一進退安
設易有誼誼侵位之事也

約軼錯衡八鸞鶴鶴以假以享我受命溥將自天降康
豐年穰穰來假來享降福無疆

嚴氏桀曰諸侯來助祭者其車以皮纏約其軾又有文錯之衡其八鸞之聲鶴鶴然和以此格神以此享

神我時王受天命廣大天降以康安之福使豐年黍稷之多穰穰然也

歐陽氏修曰上言以享者謂諸侯來助祭致享于神也下云來享者謂神來至而歆享也

蕙田案約軾錯衡四句言廟中助祭之諸侯也自天降康四句言受嘏之事也大雅既醉篇公尸嘉告鄭箋曰公尸以善言告之謂嘏辭也小雅天保篇君曰卜爾萬壽無疆鄭箋曰君曰卜爾者尸嘏主人傳神辭也楚茨篇

工祝致告徂賚孝孫苾芬孝祀神嗜飲食卜
爾百福如幾如式既齊既稷既匡既勅永錫
爾極時萬時億鄭箋云祝致神意告主人使
受嘏既而以嘏之物往予主人儀禮少牢嘏
辭云皇尸命工祝承致多福無疆與汝孝孫
來汝孝孫使汝受祿於天宜稼於田眉壽萬
年勿替引之何氏楷曰卿大夫嘏辭以宜稼
于田爲詞則天子嘏辭之旨可知矣今案自

天降康豐年穰穰即楚茨時萬時億儀禮宜
稼于田之意降福無疆即天保萬壽無疆之
意來假來享即神嗜飲食苾苾孝祀之意其
爲工祝致嘏之事無疑若如諸家之說則降
康降福兩句似主人自頌自讚未免落空無
着

顧予烝嘗湯孫之將

黃氏佐曰上旣曰賚我思成矣曰綏我眉壽黃耆無
疆矣此又曰顧我烝嘗何也蓋祖考雖享而孝孫之

心未敢必其享也故又致其丁寧之意如此

何氏楷曰此二語雖與那篇結語相同而意微有別彼重在孫字謂以一氣感通也此重在烝嘗二字謂我于烝嘗之禮相繼舉行其時時勤于祭祀如此當爲列祖之所鑒念也

序烈祖祀中宗也

輔氏廣曰那與烈祖皆祀成湯之樂然那詩則專言樂聲至烈祖則及於酒饌焉商人尚聲豈始作樂之時則歌那既祭而後歌烈祖歟

蕙田案此詩序以爲祀中宗朱傳以爲祀成

湯何元子又以爲高宗彤祭成湯之詩細玩
詩詞以爲祀中宗則烈祖爲大戊矣但烈祖
之稱已見那詩不應兩祖而同一號以爲祀
成湯是矣但泛言之則於義似混故何元子
復有彤祭之說然亦無據今案輔氏之說較
爲自然合兩詩觀之似于祭享之次序恰有
合處蓋那之專言樂聲則商人尚聲詔告天
地之間爲始祭求神之事也嘉客夷懌亦是

在位之初聞聲感動于時在廟之人莫不思
齊肅以承祭祀故有溫恭朝夕執事有恪之
語尚未實指助祭駿奔之事蓋朝踐以前氣
象烈祖篇接言烈祖申錫而詳及酒醴腥熟
移鼎受嘏皆饋食一節及以後事而助祭者
亦實著其執事靡爭之義焉商人時享之禮
文獻無徵今所存者唯此二篇可以摹擬當
時之情事以此而推輔氏之說固未可以輕

議也

元鳥天命元鳥降而生商宅殷土芒芒古帝命武湯正
域彼四方方命厥后奄有九有商之先后受命不殆在
武丁孫子武丁孫子武王靡不勝龍旂十乘大糝是承
邦畿千里維民所止肇域彼四海四海來假來假祁祁
景員維河殷受命咸宜百祿是荷

輔氏廣曰武丁孫子武王靡不勝言其德之類乎祖
也龍旂十乘大糝是承言諸侯之來助祭者皆備車
服奉恭
稷也

序元鳥祀高宗也

箋祀當爲禘疏毛無破字之理未必以此爲禘或與殷武同爲時

祀但所述之事

自有廣狹耳

李氏樗曰此詩歷言殷之先祖其實爲高宗設也高宗中興之主也大抵言奄有天下之由而發揚高宗能紹祖宗之舊服諸侯之心也祀高宗而指武丁者蓋以諱祀神者周人之制也自周以前則未嘗諱之也

蕙田案鄭箋以此詩爲禘祭改祀爲禘疏以

毛意與殷武同爲時祀今兩存之詳見禘祭

門

殷武捷彼殷武奮伐荆楚深入其阻裒荆之旅有截其
所湯孫之緒

朱子詩傳舊說以此爲祀高宗之廟蓋自盤庚沒而
殷道衰楚人叛之高宗捷然用武以伐其國入其險
阻以致其衆盡平其地使截然齊一皆高宗之功也
易曰高宗伐鬼方三年克之蓋謂此歟

維女荆楚居國南鄉昔有成湯自彼氐羌莫敢不來享
莫敢不來王曰商是常

朱子集傳享獻也世見曰王

天命多辟設都于禹之績歲事來辟勿予禍適稼穡匪
懈

朱子詩傳言天命諸侯各建都邑于禹所治之地而
皆以歲事來至于商

黃氏佐曰歲事乃周禮

春朝夏宗冬遇之屬

天命降監下民有嚴不僭不濫不敢怠遑命於下國封

建厥福

朱子詩傳此高宗所以受命而中興也

商邑翼翼四方之極赫赫厥聲濯濯厥靈壽考且寧以
保我後生

朱子詩傳言高宗中興之盛如此

陟彼景山松柏丸丸是斷是遷方斲是虔松栢有槩旅
楹有閑寢成孔安

朱子詩傳此蓋特爲百世不遷之廟不在三昭三穆
之數既成始祔而祭之之詩也

劉氏瑾曰商書曰七世之廟可以觀德蓋天子七廟三昭三穆與太祖之廟而七八世九世而後隨其昭穆親盡遞遷其主而祧于太祖之廟其有功德之君則後世宗之雖親盡而不祧別立百世不遷之廟而特祔其主焉凡有功德者皆然初不可預爲設數而商則止有三宗高宗其一也

序殷武祀高宗也

疏殷武詩者祀高宗之樂歌也高宗有德中興殷道既崩之後子孫

美之而歌此詩

蕙田案朱子以此爲立廟祔祭之詩序但以爲祀高宗而以卒章之義爲高宗復成湯之道故新路寢則亦時享之歌也今存之以俟

參考

又案享祀之禮虞夏尚矣至商有頌乃實係當時宗廟之樂章與傳記所載撫拾踈闊者不同惜正考父得於周太師者僅十二篇至孔子刪詩又亡其七今所存者僅五篇而長發爲大禘之詩與時享不同茲所錄者惟那一篇烈祖一篇爲烝嘗之禮無疑元鳥殷武則一以爲禘祭一以爲立廟而不得專屬之

時享矣然以其爲祭宗廟之詩特並著於前
以爲殷禮之實據而尚書禮記之文有關於
享祀者並載後方

商書盤庚茲予大享於先王爾祖其從與享之

傳大享
燕嘗也

疏周禮大宗伯祭祀之名天神曰祀地祇曰祭人鬼
曰享此大享于先王謂天子祭宗廟也傳解天子祭廟
得有臣祖與享之意言古者天子錄功臣配食於廟故
臣之先祖得與享之也古者孔氏據已而道前世也此
殷時已然矣大享燕嘗者燕嘗是秋冬祭名謂之大享
者以事各有對若燕嘗對禘祫則禘祫爲大燕嘗爲小
若四時自相對則燕嘗爲大禘祠爲小以秋冬物成可
薦者衆故燕嘗爲大春夏物未成可薦者少故禘祠爲

何氏楷詩經世本古義長發解曰天子夏秋冬三時之祭皆祫其以功臣配享惟當在祫祭耳月令十月有大飲烝之文指祫烝也周禮夏官司勲職云王功曰勲國功曰庸事功曰勞治功曰力戰功曰多凡有功者銘書于王之大常祭于大烝司勲詔之烝冬祭也謂之大者物成衆多之時其祭比三時爲大也方是時百物皆報焉祭有功宜矣禮記祭統衛孔悝之鼎銘曰勤大命施于烝烝鼎亦謂配享于烝祭也

周禮司勲祭于大烝鄭注死則于烝先王祭之孔疏必祭功臣在冬之烝祭者烝者衆也冬時物成者衆故祭功臣案彼書注以大享爲烝嘗者此舉冬祭物成者衆而言其嘗時亦祭之也或可周時直于烝時祭功臣殷時烝嘗俱祭禮異故也

蕙田案大享註疏以爲烝嘗今以周禮祭於大烝及孔悝鼎銘施於烝彝鼎之言証之則爲時享之祫烝無疑施於烝彝鼎者與享則各有鼎功臣之鼎當以其功銘於鼎一以別於正祭之鼎一以著其辨一以表其勲也

高宗彤日

傳祭之明日又祭殷曰彤周曰繹 疏彤者相尋不絕之意春秋宣八年六月辛巳有事

于太廟士午猶繹穀梁傳曰繹者祭日之旦日之事賓也是彤者祭之明日又祭也儀禮有司徹上大夫曰賓

尸與正

祭同日

高宗彤日越有雉雉

傳于彤日有雉異 疏高宗既祭成湯彤祭之日於是

升於鼎耳此乃怪異之事

祖已曰惟先格王正厥事乃訓于王曰惟天監下民典

厥義降年有永有不永非天天民民中絕命民有不若

德不聽罪天既孚命正厥德乃曰其如台嗚呼王司敬

民罔非天允典祀無豐于昵

註典祀有常不當特豐于近廟疏祭祀有常謂犧

牲粢盛尊彝俎豆之數禮有常法不當特豐于近廟謂犧牲禮物多也祖已知高宗豐於近廟欲王因此雖雉

之異服罪改修以從禮耳

蕙田案此殷禮繹祭之確証也

爾雅繹又祭也商曰彤

禮記郊特牲殷人尚聲臭味未成滌蕩其聲樂三闋然

後出迎牲聲音之號所以詔告於天地之間也

注滌蕩猶搖動

也疏殷人尚聲者帝王革異殷不高氣而尚聲謂先奏樂也不言夏或從虞也臭味未成謂未殺牲也滌蕩

猶搖動也殷尚聲故未殺牲而先搖動樂聲以求神也樂三闋然後出迎牲者闋止也奏樂三徧止乃迎牲入殺之聲音之號所以詔告于天地之間也者解所以先奏樂之義言天地之間虛豁亦陽也言鬼神在天地之間聲是陽故用樂之音聲呼號告於天地之間庶神明聞之而來是先求陽之義也

何氏楷詩經世本古義那解曰陳暘云凡聲陽也商人之祭先求諸陽而已日三成朏月三成時歲三成閏然則樂不三闋何以成樂哉今夫禮減而進以進爲文樂盈而反以反爲文滌蕩其聲則盈矣必繼以三闋者以反爲文也樂三闋則減矣然後出迎牲者以進爲文也凡樂皆文之以五聲播之以八音禽獸知聲而不知音衆庶知音而不知樂通聲音之號而知樂者其唯鬼神之靈乎如之何不詔告以此陳誥云聲音之感無間顯幽故殷人之祭必先作樂三終然後出而迎牲于廟門之外欲以此樂之聲音號呼

而詔告于天地之間庶幾其聞之而來格來享也

凡祭慎諸此魂氣歸於天形魄歸於地故祭求諸陰陽之義也殷人先求諸陽

馬氏晞孟曰有虞氏之祭尚氣殷人從而文之故尚聲樂由陽來則凡聲皆陽也蓋人之死也魂氣歸于天非求諸陽不足以報其魂也殷人尚聲所以迎其魂之來也方氏慙曰先求諸陽則尚聲故也聲以氣動而生故凡聲皆陽也

蕙田案殷人非不灌而求諸陰也特所尚者聲故曰先求諸陽

明堂位殷祭肝

方氏慤曰殷尚白爲勝青
故祭肝肝於色爲青故也

蕙田案此殷享祀隋祭之禮承乎夏之祭心

而更革者也

殷白牡

方氏慤曰牡言其質也郊特牲言孚牲弗食祭帝弗
用周景王時雄鷄自斷其尾憚其爲犧鷄且用牡而
況牛乎

殷尚醴

疏殷人稍
文故用醴

方氏懋曰醴則漸致其味成之以人者也然猶未厚僅足以爲禮而已

蕙田案此殷祀享之牲醴從所尚而漸文也

著殷尊也

注著著地無足疏著無足而底著地故謂爲著然殷尊無足則泰壘犧並有足也

方氏懋曰著讀如附著之著下無所承著地而已殷質故其尊從簡如此

蕙田案此殷祭祀之獻尊

爵殷以斚

注斚畫木稼也詩曰洗爵奠斚疏殷亦爵形而畫爲木稼斚稼也

方氏懋曰斚殷尊名也而爵亦名之者以爵有從尊之義故因以名焉殷質故也若行葦所謂奠斚者爵也司尊彝所謂斚者尊也爵則爲爵之形以承之周尚文故也

蕙田案此殷享祀之爵

灌尊殷以斚

疏斚畫爲禾稼

方氏慤曰灌尊實裸鬯之尊

蕙田案此與前爵斚所用不同而其飾則一

尚質故也

其勺殷以疏勺

疏疏謂刻縷通刻勺頭

方氏慤曰勺用以勺酒者疏與疏布之疏同而與疏屏之疏異蓋疏而通之無他飾焉陸氏佃曰疏勺以能不淫爲義

蕙田案此二條殷灌器

殷之六瑚

陳氏祥道曰璵者養人而不絕者也瑚以玉爲之者美而有充實之意養人以爲充實者瑚之用也

陸氏佃曰六瑚黍稷稻粱麥苽

蕙田案此殷盛黍稷器

俎殷以棋

注棋之言枳棋也謂曲橈之也疏棋枳之樹其枝多曲橈殷俎似之

方氏慤曰棋者既有橫木又爲

曲橈之形則于是爲具故也

陳氏禮書殷之橫距與夏

同而曲其足與三代異

殷玉豆

方氏慤曰玉豆則于揭之上又飾之以玉也

蕙田案二條殷享祀之俎豆

殷火

注火取其明也疏此韞制殷增以火

蕙田案此殷祭服之韞飾

通典殷禴禘烝嘗亦因虞夏之制王制云春禴夏禘

秋嘗冬烝

鄭元云此夏殷之法

其祭貴肝


蕙田案孔子曰殷因於夏禮所損益可知也

周因于殷禮所損益可知也殷之祭禮雖畧然以其所因者觀之而證以詩書傳記之所載則畧有可見者凡祭之始莫先於求神記曰殷人先求諸陽樂三闋然後迎牲則詩那之篇可證也迎牲之後當有灌以鬱鬯灌地降神所以求諸陰郊特牲灌尊殷用斚其勺用疏可證也殷之灌在迎牲後無文然記曰周人先求諸陰既灌然後迎牲是周人尚臭

故灌在迎牲之前殷人先求陽而後求之陰
則灌當在迎牲之後猶周人既奠然後煇蕭
合羶薌則求諸陽在後也祭祀之正有朝踐
饋食九獻之節烈祖之詩曰既載清酤記曰
殷尚醴又曰尊以斚則薦獻之禮可知也記
曰殷白牡詩曰亦有和羹則薦腥薦熟之禮
可知也庸鼓有數萬舞有數則合樂之盛可
知也六瑚以盛黍稷饋食之禮見矣俎以根

豆以玉薦豆籩之事見矣以至肝以隋祭尸
與主人之儀節也我有嘉客則助祭之諸侯
也爾祖與享則配祭之功臣也高宗彤日則
繹祭之明文也韞以火則猶夏致美之意也
溫恭朝夕執事有恪則猶周清廟不顯不承
無斁于人斯之意也蓋三代相因雖有損益
其綱領節目之大固無甚異焉此可考其文
而知其意也

右殷廟享



五禮通考卷八十五